





太平寰宇記卷第一百四十一

山南西道九

金州

商州

金州

金州

安康郡今

禹貢梁州之域昔虞舜嘗居之謂之

姚墟帝王世紀謂之姚墟即此也歷夏殷州不改

周禮職方氏省梁併雍又為雍州之域于周為庸

國之地戰國時為楚附庸地後為楚所滅復為楚

地秦惠文王攻楚取漢中地置漢中郡今州即漢





中<sup>即</sup>之西城縣也以地臨漢水境枕秦州故為秦楚之地焉三國志云建安二十年分漢中之安陽西城為西城郡後地入蜀蜀以申儀為西城太守後申儀降魏魏文帝使復守之因改為魏興郡移理洵口晉太康二年移理錫縣今豐利界東魏興故城是也三年又改理平陽縣今廢黃土縣東平陽故城是也至元康中又移理錫縣今均州鄖鄉縣也其封何曾為西城侯亦此地永嘉後復移理西城故城宋末分魏興之永康縣置安康郡齊不改梁于魏興郡置北梁州尋改為南梁州按後魏正

始元年北梁州長史夏候道遷舉漢中歸魏魏以漢中遺民在東垂者居此由是改為魏興郡又按梁州記後魏合華陽金城<sup>二</sup>郡為忠誠郡領亭鄉錫城金川三縣即此地孝昌三年于安康郡置東梁州西魏大統二年梁將蘭欽東伐取南鄭其魏興等諸郡還梁梁罷梁州廢帝元年大將軍達奚武吞併山南東梁州刺史李遷哲降魏魏又于魏興置東梁州三年因其地出金改為金州仍領魏興郡後周天和四年省西城縣仍移吉安縣理西城廢縣麻隋開皇三年罷郡所領縣並屬金州大業



二年改吉安為金川縣三年罷州為西城郡唐武德元年復為金州領西城金川洵陽石泉安康五縣其年割洵陽置洵州又分置洵陽驢川二縣洵州凡領三縣又置平利縣屬金州分安康置西安州又立寧都廣德二縣隸西安州二年改安州為直州三年金州置總管府管金井直洵洋南豐均折遷房重順十二州七年廢洵州以洵城洵陽驢川三縣來屬貞觀元年廢直州又省寧都廣德以安康來屬仍省驢川縣八年省洵城縣又以廢上州之廢黃土縣來屬天寶元年改為安康郡至德

二年改為漢南郡乾元元年復為金州晉天福四年升為懷德軍節度九年降為防禦州皇朝乾德四年改為昭化軍節度元領縣六今五

西城

平利

洵陽

石泉

漢陰郡安

一縣廢

清陽入洵

州境

東西四百里

南北二千里



四至八到

東北至東京一千九百里

北至西京取庫谷路一千五百四十里取藍田路一

千八百六十里

北至長安取庫谷路六百八十里取藍田路一千

里

東至均州七百三十里

南至夔州五百一十四里

西至洋州五百里

北至京兆府界五百六十六里

東至房州五百四十八里

西南至通州一千一百里

西北至京兆府長安縣界五百九十里

東北至商州六百六十里

戶

唐開元戶九千六百七十

皇朝戶主三千六百一十七客八千四百一十

五

風俗

漢高祖發巴蜀伐三秦遷巴中渠帥七姓居商洛



其俗至今猶多獵山伐木深有楚風

人物無

土產

麝香

黃檗

紙

漆

蠟

鍾乳

麩金

厚朴

西城縣

舊十七鄉今七鄉

本漢舊縣屬漢中郡應劭注漢書

云媯墟為西城舜居于此穎容釋例云舜居西城

本曰媯汭即此西魏立郡于此伏羲山按十道

要錄云拋鉸二山焚香氣必合于此山虞舜祠

按水經云西城縣故城內有虞舜祠吉挹城晉

吉挹為梁州時為符堅所攻遂于縣南九里峻山

上築此城攻圍三年挹堅守不下是名吉挹城

西城故城按鄺元注水經云漢水經月川口又東

經西城故城南其故城即漢之西城今州西北四

里漢江之北西城山之東魏興郡故城是也當谷

口路南與州城相對其西城山在州西北五里蓋

後魏時移今理

平利縣東南七十里舊本漢西城地西漢及魏蓋為

西城縣地晉于今縣南平利川置上廉縣取上廉



水為名尋又改為吉陽縣按周地圖記云上廉縣  
後移還上庸于平利川置吉陽縣後魏改為吉安  
縣後周天和四年移吉安于今州理唐武德元年  
再于上廉城置平利縣八年又移于古聲口戎南  
聲水之東黃羊水北即今縣也大曆六年以戶口  
散落併入西城縣長慶初復置藥婦山在縣東南  
八十五里周地圖記云有夫婦携子入山獵其父  
落崖妻子將藥救之並變為三石人名以此得今  
頂上有石曰父老云古仙學道于此而藥尚存  
洵陽縣東一百二十里舊本漢舊縣在洵水之陽屬  
十二鄉今十九鄉

漢中後漢省晉太康四年復立故魏于此置郡  
輿地志云魏置魏興郡領洵陽等六縣于此武  
德元年置洵州七年廢洵州以縣來屬金州  
馬跡山注水經云洵陽縣北山有懸書崖高五  
十丈刻石為文字今人不能上不知所述山下  
有石壇上有馬跡五所因名曰馬跡山洵水  
注水經云北出洵山東南流經平陽戍下與直  
水合又云水經縣北至縣東又南入沔澗水  
在縣西二十七里一名閭谷水北注于漢其閭  
字亦為驢字高帝廟梁州記云洵陽縣南山



下有漢高帝廟 留停山行人登之愛其峭拔  
多停留縱覽因名之 心山漢宣時北平陽厥  
為漢中守經此山有栖適意遂不之郡學道感  
瑞見金羊因易為姓今縣界有羊氏即厥之族  
也山下多殊草有風不偃無風獨搖上有石壇  
廢洧陽縣在州東三十里本漢洧陽縣地晉  
于此置洧口戍後大統十七年改置洧陽郡又  
于郡西三十三里置黃土縣居漢水南黃土山  
之西為名後周保定二年改洧陽郡為長岡郡  
三年郡廢移黃土縣于洧陽郡廡為理隋大業

二年以黃土縣屬金州唐天寶元年改為洧陽  
縣大曆六年以戶口散落其地併入洧陽縣  
聖公館漢水記云黃土縣雞鳴山北十五里有  
聖公館即後漢光武起義兵屯此 漢水在縣  
城南東流 洧水在縣西一百步自商州上津  
縣來東流入于漢  
漢陰縣西一百一十里舊漢安縣屬漢中郡有安  
陽故城在今縣西二十四里即今教口東十里  
漢江之北故城是也昔太康元年更名安康縣  
太康地記及太康志臧榮緒晉書地理志並屬



魏興郡宇文周始從舊縣移于今所唐至德二  
年改安康為漢陰梁門山在今縣東十八里  
即月川水之源也鳳凰山周地圖記謂鳳凰  
山為龍子山疊嶂有十二層按道書云鳳凰山  
二十層上有仙人藥園直水源出永興軍乾  
祐縣弱嶺姜子閉經縣理西又南注于漢北流  
當終南山子午谷路是也漢水在縣南二里  
東流

石泉縣

西南約三百里本漢西城縣地梁武帝立

晉昌郡治土水口夏候道遷以梁州入魏移晉

昌郡于所領長樂縣東陽卽即今石泉縣理是

也後值黃象保反叛移晉昌郡于今<sup>州</sup>理因改曰

魏昌周武成三年郡又移理東陽州仍併所領

諸縣為永樂一縣理于今縣南一里舊長樂縣

所理處續改名石泉縣以縣北石泉為名保定

三年廢魏昌郡移石泉縣理郡城即今縣理是

也唐聖曆元年改為武安縣神龍初復舊為石

泉大曆六年以戶口散落併入漢陰縣永貞元

年金州刺史姜公輔復奏本州先廢石泉縣以

地併入漢陰縣山谷重阻一千餘里來往輸納



民為不便請于舊所復置詔從之 漢水在縣  
東百步 王水口在縣西八十里

商州

商州 上洛郡 今古商於之地禹貢梁州之域周為

豫州之境周禮職方氏云豫州其山鎮曰華山

春秋時其地屬晉所謂晉陰之地戰國時其地

屬秦衛鞅封于商邑後屬內史理漢元鼎四年

于此置上洛縣屬弘農郡又續漢書郡國志云

上洛縣屬京兆尹晉初改為京兆南部後又立

為上洛郡即太始三年分京兆地置上洛郡于

西此置理是也後魏太和十一年又于此置洛州西

魏如之後周宣政元年改洛州為商州取古商於

之地為名隋大業三年為上洛郡唐武德元年改

為商州其年于上津縣置上州貞觀十年州廢以

上津來屬天寶元年改為上洛郡乾元元年復為

商州

元領縣六

今五

上洛

上津

豐陽

商洛

洛南

一縣割出



乾元州入雍

州境

東西三百三十里

南北五百五十里

四至八到

東北至東京一千二百里

東南至西京八百六里

西北至長安二百六十里

東至鄧州七百里

南至金州七百里

西至金州七百里

北至虢州四百里

東南至均州豐利縣六百八十里

西至華州山路二百七十里

東北至虢州同上

戶

唐開元戶八千九百二十六

皇朝戶主三千七百六十三客一千三百五

人物無

風俗

漢高祖發自巴蜀以克三秦遂遷巴中渠帥七姓



於商洛之間至今猶存

土產

弓材

麝香

今貢三十臍

朱砂

今貢一熊白

今貢三十斤入內

枳殼

今貢三斤

麻布

楮皮

厚朴

杜仲

黃蘗

上洛縣

舊七鄉今五鄉

本漢舊縣也竹書紀年曰晉烈公三年

楚人伐我南鄙至于上洛即此也漢元鼎四年

以其地置上洛縣居洛水之上因以為名地勢

按此即地帶楚山丹水出焉甚為隘險王莽謂明

威侯王級曰統雷之固南當荆楚統雷者言四面

厄塞屈水迴繞如屋雷也今地有七盤十二絳音絳

留堦楚山帝王紀南山曰商山又名地肺山亦

稱楚山皇甫謐高士傳四皓皆河內軹人或在汲

一曰東園公二角里先生三曰綺里季四曰夏黃

公修道潔已非義不動始皇時秦政方虐四士避

世于商山作歌曰奕奕高山深谷逶迤華紫芝

可以療飢唐虞時遠吾將何歸駟馬高蓋其憂甚

大富貴而屈人不如貧賤之肆志乃共入商嶺上

雒隱居地肺山以待天下安定熊耳山盛弘之



荆州記云熊耳東西各一峯南北望之狀似熊耳山海經熊耳山其上多漆其下多櫟浮濠之水出焉西流注于洛又按仙書謂此山上有青丹之樹得而服之成仙西京雜記云終南山多離合草葉似江蘿而紅綠是也又有丹青樹葉一青一赤望之如錦繡長安謂之丹青樹秦嶺山在縣西南一百里高九百五十丈四皓墓在縣西四里廟後高車山在縣北二里高士傳云高車山上有四皓碑及祠皆漢惠帝所立也漢高后使張良詣南山迎四皓之處因名

高車山倉野左氏傳楚左師軍于倉野嶢關即沛公入秦之路丹水在縣南一里出楚山呂氏春秋曰堯有丹水之戰是此地漢高入秦王陵起兵丹水以應之故今有王陵城存焉楚水源出縣西南楚山酈元注水經云楚水源出上洛縣西南楚山其水兩源合于四皓廟東又東經高車嶺南翼帶衆流北轉入于丹水上津縣南二百九十里本漢長利縣地屬漢中郡宋于此置北上洛郡梁改為南洛州後魏廢帝三年為上州以晉時于此置洛津戍為名仍于州



置上津郡及上津縣隋開皇三年罷郡以縣屬  
州大業二年廢上州以縣屬商州義寧二年復  
于縣理置上津郡唐武德元年又廢郡置上州  
貞觀元年廢上州以縣復屬商州天柱山亦  
名牛山在縣北一百五十里又按殷武名山記  
云上津天柱山絕岩壁立秀出衆嶺有穴名遊  
仙洞洞口有竹數莖寒風凜然人不敢入甲  
水在縣西二百步南注漢水長利水亦名仙  
水西北自豐陽縣界流入均州豐利縣界杏  
水在縣東北七十里源出石城山西漢水側石

曰中水色白而味甘每上巳與端午日遠近咸  
臻飲之治冷疾千人穴在縣東七十里穴口  
高濶三丈深二百步可容千人中有石脂凝滴  
若乳味甘治疾常有石鷲群飛出入其中嘉  
魚穴在縣東北一百五十里穴口濶三尺長有  
水至上巳日即有群魚出穴大者一尺許名曰  
鱒魚廢開元縣在縣東七十里魏前廢帝二  
年置後周保定三年廢廢漫川縣在縣北四  
十五里魏前廢帝二年置後周保定三年廢  
豐陽縣南一百一十里本衛鞅受封于此漢為商  
舊五鄉今四鄉



縣地晉太始三年分商縣之地置豐陽縣因豐陽川以為名尋廢後魏太安二年于舊縣復置仍于縣理南置上洛郡永平五年省為縣唐武德元年縣自故豐陽川移于今州西南一百六十里甲水西五十步為理麟德元年又移于今理鳴馬山在縣西四十里上留交水在縣西三里南流入皮谷水合甲水經邑界青鳳山在縣西南二百六十里青鳳之水出焉豐陽山在縣南三百五十五里高九百二十丈鬼嶺在縣南三百七十里

商洛縣

東九十里本古商國帝嚳之子高所封之地

漢為商縣屬弘農郡周地圖記云商洛郡領商

豐陽二縣屬洛州盛弘之荊州記云武關西北

一百二十里有商城即謂此邑城也隋開皇四

年改商縣為商洛縣唐武德二年自故城移于

今理按其地接南陽郡界漢立商縣所謂商於

之地商洛山在縣南一里一名楚山即四皓

所隱之處高后使迎四皓故今連亘有高車山

蓋因之得名盛弘之荊州記云上洛有商山班

孟堅西都賦所謂商洛緣其隈高士傳謂地肺



即此武閔在縣東南九十里春秋時少習地  
左氏傳曰楚使謂晉大夫士蔑曰晉楚有盟好  
惡同之若將不廢寡君之願也不然將通于少  
習以聽命注少習商縣武閔也將大開閔道以  
伐晉也又云武閔山為地門史記云秦昭王與  
楚懷王書云願與君會武閔面約結盟昭王詐  
令一將軍出兵武閔仍執懷王而歸又漢書云  
沛公攻武閔入秦商洛川在東南八里  
洛南縣東九十里本漢上洛縣地晉太始三年分  
上洛地于今縣東北八十里置拒陽縣屬上洛

郡尋省後魏真君二年又于今縣東四十里武谷  
川再置開皇二年罷郡以拒陽屬商州五年改拒  
陽為洛陽縣取洛水之南為名大業十一年移于  
今理俗謂之清化川玄扈山在縣西北一百里  
黃帝錄云帝在玄扈山上與大司馬容光左右輔  
周昌等一百二十人臨之有鳳銜圖以至帝前圖  
以黃玉為匣署曰黃帝詔司命集帝行錄帝令開  
之其文可曉黃帝再拜受圖洛水在縣北一里  
源出冢嶺山河圖玉版云倉頡為帝南巡狩登陽  
虛之山臨于玄扈洛汭之水靈龜負書丹甲青文



以授之即于此水也又注水經云洛水北過文邑  
亦謂此邑秦山在縣西北八十五里大谷龍  
龕山在縣東北八十里其山北接秦嶺多出赭金  
魚難水在縣八十里魚難山有撲水崖高五十  
尺魚不能過故曰魚難又南流經石門入洛



太平寰宇記卷之第一百四十二

山南東道一

鄧州

唐州

鄧州

鄧州南陽郡今理穰縣

禹貢為豫州之域漢書地理志潁川

南陽本夏禹之國於周為申國平王母申后之家也

戰國時屬韓史記蘇秦說惠王曰韓西有宜陽東有

宛穰即謂此地又漢志韓分晉得南陽都是未分之

前為晉地尋復屬楚至秦昭襄王十五年取韓地置

南陽郡釋名云在中國之南居陽地故曰南陽始皇

置三十六郡南陽即其一也漢志南陽郡領犍等三

十六縣理宛後漢光武帝起於南陽應白水真人之

讖在宋齊亦因之後魏太和中置荊州領南陽等八

郡居穰城置兵以備齊隋開皇初州郡不改罷郡因

以南陽為縣號而廢宛名焉當時尚隸荊州七年梁

祚既絕荊州之稱復為江陵改為鄧州以漢之鄧縣

為州名大業初分州為南陽滎陽二郡地唐武德二

年又改為鄧州領穰冠軍深陽三縣三年立順陽縣

州置總管；鄧浙鄆宛構新引等七州四年廢總管



隸山南行臺廢新州以新野縣來屬又置平晉縣六年省順陽入冠軍省平晉入穰縣八年廢宛州以南陽來屬廢鄧州以新城來屬貞觀元年省冠軍入新城天寶元年改為南陽郡乾元二年復為鄧州後梁開平三年為宣化軍節度後唐同光元年改為威勝軍周廣順二年改為武勝軍皇朝因之

元領縣九

今五

浙川

順陽

穰縣

南陽

內鄉

四縣廢

菊潭

向城

併已入上二縣

臨瀨

縣入穰

新野

舊廢入穰縣

州境

東西二百六十里

南北二百里九十里

四至八到

東北至東京八百里

西北至西京九百五里

西北至長安九百五里

東至唐州三百二十里

南至襄州一百八十里

西至高州六百四十八里



北至汝州四百九十里

東南至唐州四百一十二里

西南至均州二百四十里

西北至虢州七百里

東南至汝州四百七十五里

戶

唐開元戶四萬三千五十

皇朝戶主六千一十客一萬四千三百六十六

風俗

史記云秦滅韓徙天下不軌之人於南陽故其俗夸

奢尚氣力好商賈漁獵藏匿難制宛西通武關東受

淮海一都會也

姓氏

南陽郡十一姓 張樂趙井何白韓鄧姬周滕

人物

百里奚宛人仕虞去虞為秦穆公所用霸西戎

范蠡楚宛三戶人越王以為大夫勾踐霸乃辭去乘

扁舟出三江入五湖勾踐鑄金像於坐側 鄧禹南

陽新野人為大司馬高密侯 吳漢宛人為大司馬

忠侯伐公孫述八戰八剋 張堪南陽人 宋均南



陽安衆人時九江虎暴均為大守務退姦貪思進忠  
善其虎自去 張衡南陽西鄂人今鄧州向城縣有  
平子墓 左雄為尚書令 何宴南陽人也 黃忠  
陳震 呂乂皆南陽人 曹景宗新野人讀史至司  
馬穰苴樂毅傳撫卷嘆曰大丈夫當如是為梁右衛  
將軍 庾肩吾字慎之南陽新野人仕梁為度支尚  
書賊宋子仙破會稽購得肩吾欲殺之乃曰吾聞汝  
能作詩今可即作若能將貸汝命肩吾操筆便成辭  
采甚美子仙乃釋之詩曰髮與年俱老愁將罪共深  
聊持轉風燭慙照廣陵琴卒贈散騎常侍子信字子

山與徐擒子陵文並綺艷世號徐庾体 唐岑文本

孫羲南陽人

土產

絲布 貢

絹

蔓荊子

款冬花

進白菊花其花在騎立山有人戶看守

穰縣

舊九鄉今六鄉

本漢舊縣亦為涅陽縣地穰即戰國時

楚之別邑後屬韓秦攻韓取之封相國魏冉為穰

侯漢為縣屬南陽郡晉屬義陽郡。靈龜郭仲產

南雍州記云石橋水汙而為池出靈龜色如金鏤

○五壘山周地圖記云南陽郡西山有五堆連延



相接故號五壑山。○三戶左氏傳云晉士茂執蠻子界楚師於三戶即此郡地也。○湍水荆南圖副云作專南雍州記云縣北七里有湍水六門塌白水濁水棘水是也。○涅陽城漢為縣廢城尚存在涅水之陽。○滴水郡國志云滴水出南陽穰縣。○九井汲一井即九井俱震。○鉗盧陂周地圖云召信臣所鑿溉田三萬頃。○六門堰在縣西三里擁湍水亦召信臣所作也。信臣漢人為太守。○朝陽故城漢為縣城在今縣東南俗謂之朝濕城。○順陽故城漢縣廢城在今縣西北。○馬圈鎮在縣北

後魏立為鎮即漢之涅陽縣地後魏嘗以兵戎拒齊：大將陳顛達攻圍四十餘日不下而退即此城。○三公城即鄧禹從光武有功後歸故鄉里人造餞於此禹為太尉故城因名之。○鄧晨宅晨郡人宅有大樹晨每依廕於其下。○范蠡祠：即蠡之故宅地也蠡死之後三戶人迄今祀之今祠甚熾。○三女樓北齊蜀郡太守鄂王子雅薨葬於縣無男有三女各用錢伍百萬共造双樓於墓側工跡精妙石色可鑿故後人謂之三女樓。○石洞庭按隋云順陽縣有石洞庭口濶二尺高九尺西



北行之莫極潛連上党抱犢山。朱砂山在縣西  
七里

南陽縣

西北一百二十里  
舊七鄉今三鄉

本周之申國也漢置宛縣

屬南陽郡唐聖曆元年五月改為武臺神龍初復  
舊。北華山涓水後漢涓陽縣廢城在今縣南涓  
水之陽尚存。梅溪南雍州記云南陽縣西七里  
有梅溪源發紫山南經百里奚故宅。小長安城  
在縣三十七里涓水之東謝承後漢書云漢兵與  
甄阜梁賜戰於小長安漢兵敗退保棘陽城。周  
迴一里二百步。杜衍故城漢縣廢城在今縣西

南一十三里。刘文龍宅在縣西四十里。五穀  
大夫百里奚墓在縣西南七里有石碣存墓前有  
七星石。漢光武廟皇朝建隆四年勅立廟祭祀  
。廢臨瀨縣在縣西北八十五里本漢冠軍縣地  
後魏大和二十二年孝文割冠軍北境置新城縣  
屬南陽郡唐天寶元年改為臨湍縣漢乾祐元年  
改為臨瀨縣避廟諱今廢入穰縣。翼望山中山  
經云湍水出焉。大胡山南都賦云天封大胡列  
仙之陬。白石山盛弘之荊州記云武延城北有  
白石山。悉白自遠望之狀若層冰積雪耀奔雲



日。丁城隋圖經云宋元嘉中掠得武陽人萬戶  
遂於新城等丁城安置丁城一名新城。○清水隋  
圖經云清水經独山史定伯碑云瓜里津即清水  
上三梁謂之瓜里。○冠軍城在縣西四十五里漢  
縣漢大將軍霍去病所封之城。○張澹冢隋經圖  
云魏征南軍司張澹冢有碑刻其背文曰白楸之  
棺易朽之裳銅鉄不入凡器不藏嗟尔後人幸勿  
我傷至宋元嘉中有盜開其冢獲金銀器甚多垂  
簾皆金釘飾之。○廢菊潭縣西北一百五十里元  
五鄉本漢中鄉縣地唐開元二十四年割內鄉之

北界以置因菊潭水以名縣周顛德五年併入臨  
瀨縣。○菊水源出縣東石澗山一名菊溪水。出  
石馬峯。如馬焉其水重於諸水按盛弘之荊州  
記云源傍悉生芳菊被涯浸潭澗流滋液其水極  
甘馨谷中有三十餘家不寄井仰飲此水上壽百  
二十歲中壽百餘其七十八十者猶以為夭菊能  
輕身益氣令人久壽於此有徵矣後漢胡廣字伯  
始為侍中久患風羸南歸飲此水疾遂瘳。○湍河  
在縣南七里從內鄉界來經縣界入穰縣。○紫靈  
山在縣北一十五里其山低小。○濁山在縣西三



十里。○默河在縣東七十里源從內鄉界來。○騎  
立山出銅鑛在縣東一百八十里山有湫水三池  
每天旱於下池祈雨上中池不通人行。○廢向城  
縣本漢西鄂縣地屬南陽郡後魏孝文拓定山南  
於今縣東四十里古向城置向城縣周顯德三年  
廢入臨瀨今又入穰縣。○豐山；海經豐山有獸  
焉其狀如蝮赤喙黃身名曰雍和見則國有大恐  
。雉衡山荆州記衡山有石室甚整飾相傳名皇  
后室未詳其來。○分水嶺在縣北七十里山海經  
云南水自嶺南流北水從嶺北注故俗言此嶺為

分頭也即三鴉之第二鴉也從此而北五十里為  
第三鴉入汝州界。○故博望城漢縣屬南陽郡武  
帝時張騫侯國也。○武陽山清冷山魯陽關已上  
並在邑界。○廢新野縣東南七十里旧六鄉本漢  
旧縣屬南陽郡後漢為棘陽縣尋廢後為新野晉  
太康元年置義陽郡居新野縣屬荆州隋開皇三  
年郡廢改屬荆州七年屬鄧州今廢入穰縣。○朝  
陽故城水經注云朝水又東經朝陽縣。○樊陂在  
縣西南昔有樊鄧之邑盖因地以名之。○棘水；  
經注云棘水南經新野而歷黃郵聚即此。○光武



臺在縣北二十里南雍州記光武臺在新野縣。  
鄧晨宅在縣北二十四里。葛蒲潭後魏典略云  
孝文帝南巡至新野臨潭水而見葛蒲乃詩曰雨  
葛蒲新野樂遂建雨葛蒲寺以美之。

內鄉縣

西北二百四十里  
舊九鄉今九鄉

本楚之析邑謂白羽之地

左氏傳秦人過祈隈隈即此也後屬於秦按郡國縣  
道記析邑屬楚頃襄王元年秦昭王發兵出武關  
攻楚取析即此亦為中鄉地漢為析縣屬弘農郡  
按荊州圖副今縣東七里地名於邗即秦張儀所  
謂商於之地也永嘉末沒劉聰後魏孝文帝於此

置析陽郡理西析陽廢帝改為中鄉縣隋開皇中  
避諱改為內鄉兼置浙州貞觀初州廢來屬。馬  
戶山：有穴若戶相傳昔有馬出以為名。胡保  
山石勒時立黃攀神祠於此山號胡保山。高前  
山今名天池山：海經云翼望之山東南五十里  
曰高前之山其山上有水焉甚寒而隋帝臺之漿  
也飲之者不心痛。墨山荊州記云內鄉縣有墨  
山一謂玄山仙聖宅南有丹崖映川流之濱實為  
殊觀。丹水漢因水名置丹水縣今廢城在縣西  
南郡國記丹水楚之商密地在今內鄉縣西南一



百三十里丹水故城是也永嘉亂後廢後魏時復置屬順陽郡大業十三年省武德三年再立七年又廢其城南臨丹水。龍泉荊州記云內鄉縣西有泉。中見白壁赤柱相傳曰龍泉。析陽故城天后通天元年以析水之陽立縣今廢。析水即水經之洵水也。出析縣北南入于沔謂之洵口。鄆仲產南雍州記丹水合洵口郡國縣道記浙水經浙邑東今析水經西蓋酈氏之經誤矣。析當春秋時一名白羽。菊河在縣東三十里。漢王城在縣地一百里城內池有試劍石。九尾湖在縣西

南七十里

浙川縣西二百元三鄉唐武德二年析內縣三鄉置復後魏

西析之縣名。丹水在縣北一十五里自商州商

洛縣界流入。大黃山小黃山並在縣西一百三

十里口窄嶺山在縣西一百三十里。故浙州在

縣北三里

順陽縣西一百二十里新割二鄉本順陽鎮皇朝太平興國六年

置從鎮將孔瑩上利便故也在浙川內鄉兩縣界

之中

唐州



唐州淮安郡今禹貢豫州之域春秋時楚地故左傳

理泌陽縣屈完對齊桓公楚國方城以為城戰國時屬晉後入

韓漢志韓分晉得南陽郡秦置三十六郡為南陽郡

周地圖記後魏太和中置東荊州於北陽古城恭帝

元年改為淮州因水為名隋文帝開皇五年改淮州

為顯州取界內顯望崗為名隋末為淮安郡唐武德

四年改為顯州仍置總管領顯北澧純三州顯州領

北陽慈丘平氏顯崗四縣五年又分置唐州屬顯州

總管七年改為都督府州不改貞觀元年罷都督仍

以廢純州桐栢縣來屬二年省顯崗縣九年改顯州

為唐州以廢唐州之東陽湖陽又廢魯州之方城三

縣來屬十年以東陽屬隋州開元五年以方城仙縣

來屬三年改置上馬縣二十六年以方城來屬天寶

元年改為淮安郡乾元二年復為唐州舊屬河南道

至德後割屬山南東道州城舊治北陽唐末移於泌

陽梁改為泌州後唐同光初復舊名晉又改為泌州

漢初復旧名

元領縣六 今五

泌陽 桐栢 湖陽 方城 北陽

一縣廢



慈丘

併入北陽

州境

東西三百二十里

南北三百三十里

四至八到

東北至東京七里<sup>百</sup>

西北至西京七百里

西北至長安取葉縣路一千五百里取鄧州路一千

百二十里

東至蔡州二百七十里

西至隨州四百里

南至鄧州三百二十里

北至汝州四百二十里至葉州<sup>縣</sup>一百八十里又自葉

縣取龍興路至汝州一百八十里

東南至申州二百六十里

西南至襄州三百五十里

西北至汝州魯山縣四百三十里

東北至蔡州吳房縣三百一十九里

戶

唐開元戶一萬四千八百

皇朝戶主二千三百八十七客五千四十一



風俗

與蔡州同

人物無

土產

絹 方城黎

半夏

桔梗

茱萸

烏頭

泌陽縣元三鄉

漢舞陰縣地今有故城在其北即後漢

光武破王莽將甄阜梁賜之地後魏立為上馬縣

周地圖記云本名石馬縣以縣南石馬為名後訛

為上馬縣隋廢唐武德初又置上馬縣貞觀初又廢

之開元十三年復置天寶元年改為泌陽以地有

泌水經其陽故以名之。泌水詩曰泌之洋洋可

以療飢在邑界。桐栢山在縣東南一百八十里

桐栢縣東一百六十里元三鄉

漢志平氏縣有桐栢大復山梁

大同元年於此置華州及上州郡西魏之元年改

華州為淮州三年又改為純州後周武帝建德三

年又分置羨鄉縣以屬焉隋開皇十八年改羨鄉

為桐栢縣取桐栢山為名。桐栢山禹貢導淮自

桐栢漢志桐栢大復山淮水所出經南陽東會於

泗沂入于海。大木山俗名天目山三十六國春



秋逖為豫州刺史將家屬避難於朮山即此山也  
○菩薩山在縣東北三十里。淮水出發平氏縣  
桐栢山東流。淮瀆廟水經注云桐栢山南有淮  
源廟。前有碑是南陽郭苞立尺二碑並是南<sub>漢</sub>延  
熹中守令所造。舊有淮瀆令掌此祠。唐天寶中封  
淮瀆為長源公廟。中有石龜十二枚極大。○九渡  
水。經注云九渡水出雞翅山溪澗。縈委汭洄九  
渡。其狀零陵之九渡水也。

湖

陽縣

西南六十里元三鄉

古蓼國之地

左傳鄖人將與隋絞

州蓼代

楚師杜預注云

蓼國今義棘陽縣

東南湖

陽城是也。文公五年楚公子燮滅蓼。滅文仲聞六  
與蓼滅曰。卑陶庭堅不祀。忽諸德之不建。民之無  
援哀哉。秦滅楚屬南陽。漢為湖陽縣。○蓼山在縣  
東北二里。○紫玉水在縣東南十五里。○謝城本  
旧棘陽城。水經注云。謝水出謝城。其源微小。至城  
甚大。城周迴側水。申伯之都也。詩云。申伯番。既  
入于謝。今申國在宛北。自申遷于謝。○上馬城後  
魏所立。周地圖記本石馬縣。南有一石馬為名。  
後訛為上馬。○棘陽故城。古謝國之地。在棘水之  
陽。後為縣。有廢城在今縣北。○湖陽城後漢光武



封姊為湖陽公主即此城又按周地圖記云湖陽縣光武外祖樊重邑也

方城縣北一百九十里元三鄉本漢堵陽縣屬南陽郡應劭云

明帝改為順陽西魏置襄邑郡於此後廢唐武德

初置北澧州貞觀初改為魯州九年復廢為縣隸

唐州。黃城山即方城山也地志南陽葉縣方城

邑有黃城山。唐武山水經注云高鳳所隱處號

西山。衡山漢志衡山澧水所出即桐栢之連岡

也。餅餡山在縣東三十里。堵水一名柘水

經堵水出堵陽縣北山數源並發南流經小堵鄉

謂之堵水

北陽縣東北七十五里元二鄉漢縣屬南陽郡後魏置東荊州

於漢北陽故城又為淮州隋改為顛州因顛望岡

為名唐貞觀元年改為淮州唐今縣理即州故城。

北水南流入縣西水經云泚水出泚陽縣東北大

胡山一名馬仁陂溉田萬頃蓋此水之聚澤也。

苦菜山在縣西北三十五里即黃城山也自葉至

北陽南北相毗連亘百里亦曰長城山即長沮桀

溺耦耕處下有東流水即子路問津之所尸子云

楚狂接輿耕於方城即此山。溱水亦謂之青衣



水。○澠水。○油水。○隴水。皆北陽水名。○楚平王祠。即昭王父也。○伍相祠。○漢高祖祠。○光武祠。三祠潔敬甚衆。○宋玉冢。楚大夫。○樊女冢。即楚姬也。○湖陽公主冢。後漢光武姊。○廢慈丘縣。在州東七十里。漢北陽縣地。屬南陽郡。後魏於此立江夏郡。尋廢為戍。隋開皇十八年改為慈丘縣。取界內山為名。周顯德三年入北陽。○大湖山水經。泚水出大湖山。即天封山。張衡南都賦。天封大胡列仙之陬是也。○中陽山。一名慈丘山。亦名上介山水。經規水出上介山。即此山也。



校勘

鄧州總序

漢書地理志潁川南陽本夏禹之國於周為申國

按前漢書地理志潁川郡陽翟縣夏禹國又南陽郡宛縣申伯國莽曰南陽今記既誤以陽翟為南陽又宛王莽嘗改為南陽今亦為南陽縣故以今南陽錯陽翟言之兩皆抵牾

內鄉縣總序

隋開皇中避諱改為內鄉兼置浙州



按隋書地理志云浙陽郡西魏置浙州又內鄉縣  
舊曰西浙西魏改為內鄉今記隋皇中避諱改  
為內鄉與元和郡縣志同其曰兼置浙州未知  
據何書然皆與隋志不合

太平寰宇記卷第一百四十三

山南東道二

均州

房州

均州

均州武當郡今武當縣禹貢豫州之域春秋及戰國其地並

屬楚史記秦昭襄王三十五年置南陽郡其地屬焉

在漢為武當縣屬南陽郡後漢因之在荊州部魏屬

南鄉郡晉屬順陽郡齊永明七年於今鄖鄉縣置齊

興郡輿地志云梁武帝以此郡為南始平郡復有武

功武陽二縣仍屬南雍州太清元年於梁州之齊興



郡復興州後魏廢帝元年改興州為豐州所因以豐  
城為名後周武成元年自今鄖鄉城移於延岑城即  
是今郡理也隋開皇三年罷郡豐州不改五年改豐  
州為均州因界內均水為名大業初廢州改為浙陽  
郡今郡城即後漢將延岑所築義寧二年割浙陽郡  
之武當均陽二縣置武當郡又置平陵縣唐武德元  
年改為均州七年省平陵縣八年省均陽入武當其  
年以豐州之鄖鄉堵陽安福三縣來屬貞觀元年廢  
均州又省堵陽安福二縣以武當鄖鄉二縣屬浙州  
八年廢浙州又以武當鄖鄉二縣置均州又廢上州  
割豐利縣來屬天寶元年改為武當郡乾元二年復  
為均州貞觀五年勅均房二州隸山東南道

元領縣三 今二

武當

鄖鄉

一縣廢

豐利

縣入鄖鄉

州境

東西三百六十六里

南北一百四十里

四至八到

東北至東京九百八十里



東北至西京八百八十五里

西北至長安九百里

東至鄧州二百四十四里

南至房州二百六十八里

西至金州七百里

北至鄧州內鄉縣二百六十八里

東南至襄州三百七十里水路三百六十里

西南至房州三百七十二里

西北至高州上津縣石丹山界三百四十四里

東北至鄧州三百四十四里

戶

唐開元戶一萬三千七百

皇朝戶主三千七百九十二客三千七百二十七

風俗

漢書地理志漢中風俗與汝南郡同有漢江川澤山林以原隰多以力耕火種人性剛烈躁急信巫鬼重  
淫祀尤好楚歌

人物無

土產

鹿脯今貢

麝香

麝香

山鷄皮



姜蕤

椒

蠟

武當縣

舊八鄉  
今三鄉

本漢舊縣屬南陽郡取武當山以名

縣舊治延岑城唐顯慶四年移於今所。武當山

一名太白山武當山記云區域周迴四五百里中

央有一峯名曰叅嶺高二十餘里望之秀絕出於

雲表清朗之日然後見峯一月之中不過四五日

輕霄蓋其上白雲帶其前旦必西行夕而東返則

惟其常謂之朝山蓋以重山朝揖之主也郭仲產

南雍州記云武當山廣員三四百里山高壘峻若

博山香鑪若亭峻極干霄出霧務學道者常百數相

繼不絕若有於此山學者心有陰替輒為百獸所

逐陶弘景玉壘云太白山形南北長高大有神靈

棲憑之者甚多太白山雖在南陽界而去洛陽甚

近度輾轉南陽界而北趨魯陽便得至焉又南雍

州記云武當山有石門石室相傳云尹喜所棲之

地陰君內傳云君字長生入武當昇仙。石階山

隋圖經云一名華岳地肺一名肺山福地記云西

北角有大松樹；下生草名救窮冬夏不枯日食

三寸絕穀不飢登之度世陶先生謂之西岳佐命

是也。女思山漢武當長來劬女嫁為河內張德



子婦隨夫還至此山南望其父思慕而死即葬此  
山女即來歙曾孫也。三夫人峯亭若博山亭香  
鑪。古塞山在今縣北戰國時楚築以備秦。今城  
所據之山峻嶮按今名大寨山是。三王城前漢  
末王匡王鳳王常所築各一城今號三王城。社  
樹隋圖經云南陽武當門有社栢樹大四十圍梁  
蕭欣為郡伐之言有大蛇從腹中墜下麤數圍長  
三丈群蛇數十隨之入南山聲如風雨未伐樹前  
曾見夢于欣不之信後欣果死于治所

鄖鄉縣

西一百一十三里  
旧八鄉今五鄉

古麋國之地左氏傳曰楚

潘崇伐麋至于錫穴漢初置錫縣按地記云漢中  
郡之東界有錫縣即古之錫穴也漢中郡今縣城  
即漢理晉太康五年改錫縣為鄖鄉縣梁代志云  
其地出猫牛沙牛。堯年山在縣東十里即漢中  
郡與南陽郡分界處。西山今名寶蓋山水經注  
云鄖鄉有西山。有石蝦蟇倉卒看之與真不別  
山北有崖傍視之有一穴甚明傳號為星牖。很  
子山隋圖經云山臨漢水山邊鑿石作六字皆方  
一尺四猶識云玄田中丘西字不可識山下有很  
子塚為水所壞今成小洲亦謂很子墓父之所。



渚水在縣西六十里有渚水漢地志注云渚水入于漢俗名漢口是。寒泉水注水經云漢水又東謂之滂難冬則水淺而下多大石又東為淨灘夏水急盛川多湍狀行旅苦之故諺曰冬滂夏淨斷官使命言二灘阻礙也。滄浪洲隋圖經云漢水逕琵琶谷至滄浪洲即漁父掉歌處庾仲雍漢記云謂之千齡洲亦通名滄浪水又東逕龍巢山下。○丹水隋圖經云豐州丹水出丹魚先夏至前十日夜伺之浮水有赤光上照如火以網取之割其血以塗足以步行水上。

廢豐利縣

西二百四十里元鄉

本汗長利縣地後漢省晉

復立太康五年改長利為錫縣所屬不改宋於此

僑置南上洛郡屬梁州後魏分錫縣置豐利縣按

荊州圖副云豐利熊川陽川三縣即武當之地唐

武德元年置上津郡於此貞觀八年廢郡以縣屬

均州皇朝乾德六年併入鄖鄉縣。錫義山一名

天心山在縣東北六十五里道書福地志云天心

之山方圓百里形如城四面有門上有石壇長十

餘丈山高谷深多生薇銜其草有風不偃無風獨

搖也



房州

房州

房陵郡今理房陵縣

土地所屬與金州同此即古麋庸二

國之地麋音君春秋為房子國左氏傳曰楚子伐麋

成大心敗麋師於防渚即是此也又鬲駟云防陵

即春秋時防渚也史記秦惠文王三十年攻楚取

漢中地置漢中郡始皇滅趙徙趙王遷於房陵是

此其地四塞險固即為漢中郡地其後始皇誅呂

不韋其家亦徙於此歷兩漢郡如之後漢末以為

房陵郡華陽國志孟達降魏文帝合三郡為新

城以達為太守理上庸達後叛歸蜀司馬宣王討

之仍從新城移理房陵歷晉宋齊為新城上庸二

郡梁天監末立岐州與郡同理房陵侯景之亂地

入後魏廢帝二年改新城郡為光遷國昔傳此地

古有三百人於州西南房山中學道得仙因名其

地為廣仙後人語訛謂光遷後周武帝三年廢國

為遷州改房陵為光遷縣隋因之煬帝廢州為房

陵郡唐武德元年改為遷州領光遷永清又置受

陽浙川房陵凡領五縣其年又於竹山縣置房州

領竹山上庸又置武陵凡領三縣五年廢遷州之

浙川七年又廢房陵受陽二縣貞觀十年廢遷州



自竹山移房州治於廢遷州城其年省武陵縣改  
光遷為房陵縣天寶元年改為房陵郡乾元二年  
復為房州貞元五年以房州均州隸州南東道皇朝  
為保安軍節度

元領縣四

今二

房陵

竹山

二縣廢

上庸

山入竹

永清  
房陵入房

州境

東西二百五十里

南北二百五十四里

四至八到

東北至東京一千五百里

東北至西京一千五百五十五里

西北至長安一千四百六十八里

東至襄州四百二十四里水路五百八十四里

南至歸州山路五百里

西至金州五百五十里

北至均州二百六十里

東南至襄州界五百七十九里

東北至襄州界一百七十八里



西南至金州界五百七十八里

戶

唐開元一萬四千四百四十二

皇朝戶主四千八百八十二客六百九十

風俗

與金州同

人物無

土產

賦紫布

鍾乳

麝香

石楠葉

黃岑

羚羊角

雷丸子

黃蘗皮

房陵縣

旧十本漢旧縣屬漢中郡初為防字後漢改

為房

以陵為名。建鼓山袁山松記云登勾將山

見馬鬣建鼓凝然天半華陽國志云此即山水之

難有馬鬣建鼓之險。房山在縣西南四十里其

山四面有石室似房因為名。狼山夾水導源出

此山。筑水注水經云筑水出梁州閬陽縣魏遣

夏侯淵與張郃下巴西集軍宕渠劉備軍筑口即

是此水所出又按漢志云筑水東至筑陽入沔今

按筑水在州理北東流經永清縣南又東北流至

襄州穀城縣南又東北方注于江漢。黃香塚香



後漢為吏部尚書即此郡人有全孝之名卒于此  
有塚在郡東。北河水源出縣西界來遶城東流  
不通船有石崖門阻隔。又有三十五小溪其名  
惡者有臨愁水。城四面有三十四小山其名惡  
者有罵詈山。三王塚在縣南有大家三所號三  
王冢縣北有趙王冢並無碑記皆故老所傳。廢  
永清縣在縣東一百一十里本漢防陵縣地周地  
圖記云後魏廢帝三年分房陵東境於今縣東六  
里置大洪縣屬光遷國後周保定二年移於今理  
乃改為永清縣今併入房陵縣。景山在縣西南

二百里東與京山連接有阻水源出景山一名雁  
浮山。海經云荆山之首曰景山。鴈南翔北歸徧  
經其上土人由茲改名為鴈塞山。又曰荆山之首  
曰景山上多金玉。筑水在縣南三里東流。粉  
水源出縣東北永林山注水經云粉水導源東流  
經上粉縣取此水以淘粉則皓曜鮮潔有異衆流  
。粉城因粉水為名

竹山縣東一百五十里元八鄉本漢上庸縣古之庸國也今縣

古城即是昔周武王伐紂會諸侯於盟津之上庸  
人往焉故尚書泰誓曰庸蜀羌髳微盧彭濮人即



此也漢書志上庸縣屬漢中郡。白馬塞山盛弘之荊州記云孟達為新城太守登白馬山而歎曰劉封申耽據金城千里而不能守豈丈夫也哉為上堵吟今人猶傳此聲音韻憤激其哀思之音乎遊者云重山疊障事亦信然。方城山在縣東三十里左傳云楚使廬戢黎侵庸及庸方城即此山項平坦四面峻。龍祇山在縣南二里古老相傳昔有道士王若冲於此山服栢葉身上毛生碧綠色白日昇天。黃竹山在縣東一百里。鰲水源出縣西十里入堵水其水足蛇邑人云莫飲鰲

水。中有蛇龜一名龜水。上玄水在縣北六十里源出庸嶺下南流入孔陽水有潭深不可測或投石其中即卒風暴雨。漫水在縣西四十里出王家山下南流入武陵水堪浣羅紗色白如練。鬼田在縣東二里隔堵水約二頃不生樹木只有茅荻每歲清明日祭而燎之預卜其豐儉燎草至盡即是年豐風俗為驗于今亦然。堵水源出金州平利縣界黃平源嶺下圖經云郭帶堵水通漢江舟船往來商賈所湊也。廢上庸縣在州西二百五十里本漢上庸縣古上庸城在縣東四



十里武陵故城是也後漢省曹魏更立屬新城郡  
明帝改屬上庸郡蕭齊改為武陽縣梁改為新豐  
縣又改為武陵縣後魏改為京川縣廢帝二年改  
為孔陽縣以西有孔陽水為名隋開皇三年罷郡  
廢孔陽縣為理今併入竹山縣○庸城山在縣西  
五里舊名懸鼓山庸人居此山置鼓○王冢山在  
上庸縣西六十里古老相傳云有王冢在此○孔  
陽水在故縣西十步其源出檀溪嶺下其水洗物  
除垢亦堪磨刀劍甚利也

太平寰宇記卷第一百四十三

校勘

房州總序

華陽國志孟達降魏文帝合三郡為新城以  
達為太守理上庸達後叛歸蜀司馬宣王  
討之仍從新城移理房陵

按今記所引與華陽國志多舛謬今畧從本  
文校定然華陽國志新城治房陵今云理上  
庸又雜取之他書矣

房陵縣

筑水注水經云筑水出梁州閬陽縣魏遣夏侯



淵與張郃下巴西集軍宕渠劉備軍筑口即是  
水所出按今記房陵穀城二縣所載則筑水自  
房陵流至穀城入沔其會沔處為之筑口穀城  
即漢之筑陽距房陵尚三百餘里又自房陵至  
南鄭千二百餘里夏侯淵張郃屯漢中數犯暴  
巴界先主令張飛進兵宕渠與郃等戰於瓦口  
郃等敗收兵還南鄭漢宕渠故城乃在今渠州  
沔江縣界時張飛以巴西太守拒郃等還南鄭  
則當取道今巴西無緣相拒於穀城之筑口意  
宕渠自有瓦口而水經誤以為沔口今記又誤  
以為筑口也水經又載沔水出閬陽縣東過巴  
西歷巴渠新城上庸東逕沔陽縣故城晉分筑  
陽以立又東流注于沔按宋書州郡志閬陽屬  
新城郡：治房陵去閬陽必不遠沔水不應自  
閬東流過巴西乃更立歷巴渠上庸復經筑陽水經  
之誤審矣又今記房陵縣有西筑水上筑水似  
是沔水而誤為筑：口沔水皆當在穀城之間  
今載於房陵亦誤



太平寰宇記卷第一百四十四

山南東道三

隨州

郢州

復州

隨州

隨州漢東郡今禹貢荆及衡陽惟荆州虞舜及周皆

為荆豫之域在周又為隨國世本云隨姬姓也春秋

傳曰楚武王侵隨鬬伯比言于楚子曰漢東之國隨

為大隨國今義縣是也其後為楚所滅戰國時其地

屬楚秦并天下為南陽郡地漢初立為隨縣屬南陽



郡後漢如之晉屬義陽郡後分置隨郡宋齊因之西魏置并州尋廢大統十六年尅定隨安陸二郡改隨郡為隨州隋初如之大業初廢州以其地分置漢東壽陵二郡唐武德三年復并為隨州領隨縣光化安貴平林順義五縣貞觀十年割唐州東陽來屬天寶元年改為漢東郡乾元二年復為隨州今郡城古隨國之地皇朝乾德四年升為崇義軍節度尋改崇信軍

元領縣四

隨縣

東陽

唐城

光化

州境

東西三百七十里

南北二百一十里

四至八到

東北至東京一千一百里

西北至西京一千一百六十五里

西北至長安一千四百三十五里

東至安州一百五十五里

南至郢州四百六十里

西至襄州三百五十里

北至唐州三百六十里



東至申州二百四十四里

西北至唐州四百三十五里

東南至安州三百六十里

戶

唐開元戶二萬六千九百

皇朝戶主三千一百六十四客三千四十九

風俗

同唐州尤多獵山伐木

人物無

土產

蒲黃

枳實

會羅

柰花綾

小絹

葛

覆盆子

隨縣

舊十二鄉  
今二鄉

漢舊縣後漢初平林兵起乃此邑之

地今邑東北有平林鄉即王常起兵之所梁立曲

陽郡後為西魏復得其地因立郡於此。三鍾山

在縣東五十里山有雉狀如覆鍾。鸚鵡山在縣

東北一百一十五里石狀如鸚鵡。隨侯堂。厲

鄉左氏傳楚人伐徐齊師曹師伐厲以救之。九

井荆州記云厲鄉西有塹兩重塹內有地俗謂之

神農宅中有九井汲一井則八井震動民多不敢



觸在縣北一百里。○斷蛇丘在縣西北一十五里。按搜神記隨侯出矚見白蛇被傷乃築坻於縣東北骸山側牧養既愈放之後啣徑寸珠以報德。○隨侯墓在縣北二十里輿地志云隨縣北二十五里有隨侯墓今里數不同以古今尺步有異。○隋文帝廟在州東南一里唐天寶七年置。○季梁廟在州南八十步按左傳楚武王侵隨而求成焉隨少師請追楚師季梁止之曰天方授楚之羸其誘我也君何急焉君姑修政而親兄弟之國庶免于難隨侯懼而修政楚不敢伐人思其德為廟祀。

焉。○厲山在縣北一百里高一里荆州記云隨地有厲鄉村有厲下有一穴是神農所生穴也穴口方一步容數人立今穴口石上有神農廟在。○驢泉山在縣北九十里上有池旱不涸昔出神驢故以為名荆州記云石驢泉山溷潤牛馬經過貪其甘不能去土人云牛馬解逸即山尋之。

東陽縣西北二百里舊本漢蔡陽縣地後魏於此立南荆州隋大業初改置春陵郡仍改邑為東陽縣唐初郡廢而邑隸隨州。○光武廟今在縣南有水源。○春陵故城在今縣東漢文帝時以春陵之國



地多卑濕因割蔡陽之白水上唐二鄉為舂陵侯  
邑自零道縣徙於此識之所謂白水真人處。襄  
鄉故城漢為縣今廢城在今縣東北。下澧戍梁  
天監中置在縣東南一百里後魏宣武帝正光初  
南伐破之置為鎮後梁又收復却為郡皆此戍也  
唐城西北一百五十里漢隨縣地後魏於此置澌西

縣兼立義陽郡後又改為肆州或曰唐州隋廢之  
唐開元二十五年以客戶編成十二鄉置唐城縣  
後梁改為漢東縣漢初復旧。唐鄉左氏傳云晉  
楚戰于邲唐侯為左拒杜註云唐侯楚之小國即

此山。古唐城自梁朝乾元二年改為漢東縣後  
唐同光元年復為唐城晉朝天福元年又改為漢  
東縣漢乾祐元年却改為唐城縣

光化縣南三十四里舊自漢至宋為隨縣之地南齊

立為安化縣後為西魏文帝剋之改為光化縣。

錫水在縣西北十里源出隨縣大浩山荆州記云  
屬山下有厲鄉村臨錫水。楚子城在縣北十八  
里左氏傳桓公八年楚子合諸侯于沈鹿黃隨不  
會使遠章讓黃楚子伐隨因築此城以通隨故號  
楚子城



郢州

郢州富水郡今歷代所屬與竟陵郡同二漢屬江夏

郡地晉宋以來為竟陵郡地梁時即南司北新二

州之境西魏分屬安州武帝分置石城郡後於石

城置郢州隋煬帝初州廢置安陸竟陵二郡唐武

德四年并二郡立温州于長壽縣置郢州京山監

水二縣屬焉七年廢基州以章山來屬貞觀元年

省監水入長壽又廢郢州以長壽屬温州章山屬

荆州十七年廢温州依舊置郢州治京山天寶元

年改為富水郡乾元二年復為郢州

元領縣三

今二

長壽

京山

一縣廢

富水

併入京山

州境

東西一百六十五里

南北五百二十五里

四至八到

北至東京一千二百里

西北至西京一千二十五里

西北至長安一千三百八十五里



東至安州三百二十九里

南至復州三百里

西至長陵府二百八里

北至襄州三百一十六里

東南至復州界一百五十六里

西南至江陵府界八十里

西北至襄陽界三百一十六里

東至隨州四百六十里

戶

唐開元戶一萬二千

皇朝主戶一千三百八十八客二千六百五十八

風俗

同荊州然清明節鄉落

唱水調歌

人物

宋玉郢人

土產

紵布

丹參

牛膝

貢貝母

長壽縣

舊十二鄉今二鄉

在漢為竟陵縣地屬江夏郡晉武

帝改為長壽縣屬竟陵郡後周立郡於此而縣隸

焉。偃月城郡國志云竟陵有偃月城：三面漳



水擁焉。武陵山郡國志云左傳謂楚武王卒于  
楠木之下即此山也地又名武陵青泥池即三國  
志樂進與關羽相拒之所亦曰楠木山在縣東一  
里。竟陵故城漢為縣故城在今縣南。寶香山  
在縣北一里。漢江在縣西四十步。金港在縣  
二百步源出楠木山。激河在縣北二十里源出  
京山縣東。白雪樓基在州子城西。激河池在  
縣北一十五里南流合激河西入漢江。龜鶴池  
在縣西一十里步是南昌尉梅福未登仙時養龜鶴  
池。金鷄塚在縣南六十里

京山縣

東一百一十里舊四鄉今見管十一鄉

歷晉宋已來為新陽縣梁

改為新州

因舊邑之名

以自知西魏改為溫州隋

初廢州改為京山縣因界內京山為名倪子山在

縣東南四十五里。張良山在縣北一十里山有

張良走馬路至今不生草木。鴨嘴山在縣南二

里。泗河在縣西四十里東入復州竟陵縣界。

溫泉湯在縣東一十五里其湯有十八眼。廢富

水縣在州北二百四十里隋置因界內富州水為

名。皇朝乾德二年併入京山縣。富河在縣北

一百里從隨州隨縣來入安州應城縣。新市故



城後漢為縣故城在縣東北

復州

復州竟陵郡今禹貢荆州之域虞舜及周地屬不改

春秋戰國時屬楚秦屬南郡于漢十三州在荆州

部即江夏之竟陵縣地晉分置竟陵郡宋齊因之

後周得之以其地置城復二州隋初如之至煬帝

初廢州於舊郢州置竟陵郡今富水縣是也於舊

復州却立沔陽郡唐武德五年改為復州治竟陵

縣七年移理沔陽天寶元年改為竟陵郡乾元

年復為復州晉天福五年升為防禦州

元領縣三

今二

景陵

沔陽

一縣割出

監利

州入荆

州境

東西一百八十里

南北四百五十里

四至八到

北至東京一千四百里

西北至西京一千四百二十五里

西北至長安一千六百八十五里



東至蘄沔州陸路三百四十里水路七百里

南至沔陽縣陸路一百四十里自縣南至岳州水路

五百里

西至江陵府四百八十里

北至郢州私路二百五十里官路三百里

東南至蜀江水流為界七百四十里

西南至赤岸港為界三百五十七里

西北至乞火山東與郢州為界三百五十四里

東北至安州三百四十里

戶

唐開元戶八千二百一十

皇朝戶主三千一百一十七客四千三百一十一

風俗

與荆襄同

人物無

土產

白苧布

大膝

狼毒

大戟

烏啄

鹿皮

景陵縣

今四鄉本漢竟陵縣屬江夏郡盛弘之荊州

記云晉元康九年分江夏郡置竟陵郡而縣屬焉



晉天福初改為景陵縣。中戍山水經云竟陵郡  
有中戍山晉獲銅鍾七枚於此。五華山在縣東  
北七十里周地圖記云五花山。嶺連屬北接郢  
州即此山是也。沔水即春秋謂周昭王南征乘  
膠舟以進尋沒此水。夏水郡國志於滄浪之水  
漁父所歌。於此水其側又有熨斗陂存。郢縣  
古城漢為縣廢城在今縣東。雲夢城郡國志云  
竟陵城西大澤即古雲夢澤也。邾月城在河口  
魏將黃祖所守之城

沔陽縣

南一百二十里  
舊四鄉今二鄉

本漢沔陽縣地又郡國志云

沔陽縣即楚王城也。七里汙按周地圖記云夏  
水合瀘水同入漢自漢入瀘水名為七里汙即屈  
原逢漁父與言濯纓鼓枻而去是此也。沔水  
自西入大江晉鎮南將軍杜元凱為荊州刺史開  
楊口起夏水達巴陵千餘里內瀉長江之險外通  
零桂之漕。夏水：自南入大江一名長夏水西  
南自監利縣界流入水經曰沔水又東南逕江夏  
雲杜縣東夏水從西來注之為中夏水荊州圖副  
云此夏水既非山流有渚川瀘冬斷夏通故曰夏  
水。大隱林郡國志云沔陽大隱林又有小隱林



南有隱磯山是漁父釣所。雲杜故城漢為縣故  
城在今縣西北。石城在縣東南三百里古保聚  
之所。鼉湖在縣東二十里。馬骨坂楚平王牧  
馬。遺骨於此坂。白猿廟郡國志沔陽有白猿廟  
即楚平王獲白猿於此立廟。魚復縣故城在縣  
東十五里

太平寰宇記卷第一百四十四

校勘

隨州

棗陽縣

下澁戍後魏宣武帝正光初置為鎮

按後魏紀年宣武帝有正始而孝明帝有  
正光然未見破下澁戍事所出未知孰誤



太平寰宇記卷第一百四十五

山南東道四

襄州

光化軍

襄州

襄州襄陽郡今禹貢荆豫二州之界禹貢曰荆及衡

陽惟荆州又曰荆河惟豫州即襄鄧二州之界也周

禮職方氏曰正南曰荆州其川江漢亦荆州之分周

時即穀鄧鄴盧羅却之地春秋時屬楚習鑿齒襄陽

記云襄陽城本楚之邑檀溪帶其西峴山亘其南亦



為楚國之北津也楚有二津謂從襄陽渡沔自南陽  
界出方城關是也通周鄭晉衛之道其東則從漢津  
渡江夏出平輿關是也通陳蔡齊宋之道又為秦南  
陽郡即昭王十六年使左更錯伐楚取鄧封公子悝  
始置南陽郡西漢為鄧縣之地荆州圖副云建安十  
三年魏武平荆州始置襄陽郡以地在襄山之陽為  
名按郡西極梁州南包臨沮北接陰鄧襄陽為郡始  
于此矣又楚地記云漢江之北為南陽漢江之南為  
南郡蜀關羽攻沒于禁等七軍兵勢甚盛獨襄陽徐  
晃屯守不下曹公謂晃曰全襄陽徐公之力也後吳  
大帝帥兵西向時曹仁鎮之司馬宣王言於魏文帝  
曰襄陽水陸之衝禦寇要地不可失也魏自赤壁敗  
後因失江陵於是荆州都督專在宛沔此地屬吳郭  
仲產云劉表嗣子北降襄陽沔北為戰伐之地自羊  
公鎮此吳不復入東晉大將軍庾翼將謀北伐遂鎮  
襄陽

元領縣七

今六

襄陽

鄧城

穀城

宜城

中廬

南漳

一縣割出



樂鄉併入荆

州境

東西二百四十六里

南北三百六十七里

四至八到

東北至東京九百里

北至西京八百五十五里

西北至長安一千八十五里

東至隨州三百五十里

南至荆門軍三百二十五里至荊州四百七十里

西至房州四百七十里水路五百八十四里

北至鄧州一百八十二里

西至均州三百六十里

東南至郢州三百七十里

西南至陝州六百一十九里

西北至光化軍一百八十里

東北至唐州二百五十里

戶

唐開元戶八萬九千一百

皇朝戶主一萬一千三百六十三客一萬五千五百

二十九



風俗

襄陽風俗記云屈原五月五日投汨羅江其妻每投食於水以祭之原通夢告妻所祭食皆為蛟龍所奪龍畏五色絲及竹故妻以竹為糉以五色絲纏之今俗其日皆帶五色絲食糉言免蛟龍之患又原五日先沉十日而出楚人於水次迅楫爭馳掉歌亂響有悽斷之聲意存拯溺喧震川陸風俗遷流遂有競渡之戲人多偷惰信鬼神崇釋教

人物

宋王宜城人

王延壽字文考宜城人

龐德公襄陽人居峴山之南未曾入城

向郎字臣遠仕蜀光祿勳

馬良字季常宜城人兄弟五人並有才名諺曰馬氏

五常白眉最良

習鑿齒襄陽人字彥威著漢晉春秋

唐張柬之襄陽人相則天首謀誅張易之以功拜天

官尚書鳳閣鸞臺三品封漢陽王

杜審言襄州襄陽人孫甫

鮑防襄州人

土產

貢鹹乾魚

丹麀皮

大麻布



庫路真

麝香

鼈甲

縮砂

弓弩材

漆器

宜城出美酒今在宜城縣也俗號宜城美酒為竹葉  
杯襄陽著舊傳曰岷山下漢水中出鱖魚味極肥而  
美襄陽人採捕遂以槎斷水因謂之槎頭縮項鱖魚  
為水族上味孟浩然詩試垂竹竿釣果得槎頭鱖是  
也

襄陽縣

今一  
四三十鄉

本漢舊縣屬南郡應劭曰在襄水

之陽縣因名焉州郡志云襄陽本漢為中廬縣地  
漢初徙駱越之人居之。望楚山在縣南三里鮑

至南

雍州記凡三名一名馬鞍山又名災山宋元嘉

中武陵王駿為刺史屢登陟焉因其舊名以望見

鄢城改為望楚山後遂龍飛為孝武帝所望之處

時人號為鳳嶺高處有三塔是劉弘山簡寺九日

宴賞之所。岷山在縣十里羊祜常與從事鄒湛

寺共登岷山慨然歎息曰自有宇宙便有此山由

來賢達勝士登此遠望如我與卿者多矣皆湮滅

無聞使人悲傷如百年後有知魂魄猶應登此山

也湛寺對曰公德冠四海道嗣前哲令聞令望必

與此山俱傳若湛輩乃當如公言耳後以州人思



慕遂立羊公廟并碑于此山。石梁山南雍州記云石梁山形似橋梁也。白雲起即崇朝而兩人以為準。萬山在縣西八里一名漢皋山。習鑿齒襄陽記云山北隔沔水。父老相傳即交甫見游女弄珠之處。漢水盛弘之荊州記城北沔水隈潭極深。先有蛟龍年為人害。鄧遐為襄陽太守。勇果兼人技劍入水。蛟繞其足。遐因揮劍截蛟。被傷流血。若丹自後無復蛟患矣。柳子水即海池之別派也。檀溪即梁高祖沉竹木於此溪。中劉備乘的盧馬躍過檀溪亦此也。涑水亦名襄水。荆楚之池水。駕山而上者皆呼為襄。上也。今土人呼為涑。水上流亦呼為襄。名即無定。故陸澄地理記云襄陽無襄水也。又按襄沔記云中盧有涑水注于沔。此水中有物如三四歲小兒。膝頭如虎掌。爪常沒水中。出膝頭示人。小兒不知者欲取。弄之輒便啖。人或人有生得者。摘其鼻厭可。小使之名曰水虎。○習郁池在縣東南一十五里。襄陽記云峴南八百步。西下道百步。有習家魚池。習郁將死。勅其長子。塋于池側。池中起釣臺。尚在。按郁即鑿齒之先也。餘事跡解見鹿門廟。○墮淚碑在縣東九里。晉



羊祜之鎮襄陽有功德於人及卒百姓于峴山祜  
平生遊憩之所建碑立廟歲時響祭望其碑莫不  
流涕杜預因名墮淚碑。貞女樓按南雍州記云  
王整之姊適衛玠十六而寡父母欲嫁之乃自截  
鼻以誓墓前柏樹為之連理。高陽池在縣東南  
十五里晉山簡字季倫常鎮襄陽每臨此地未嘗  
不大醉而還時人為之歌曰山公出何許徃至高  
陽池日夕倒載歸酩酊無所知時：能騎馬倒着  
白接羅舉鞭向葛強何如并州兒又通典云馬鞍  
山昔劉弘山簡九日宴處。古堤襄陽城有古堤  
皆後漢胡烈所築嘗為襄陽太守惠化及人塞補  
決堤民因歌曰譬春之陽如冬之日耕者讓畔百  
姓豐溢惟我胡父恩惠難忘。冠蓋里盛弘之荆  
州記云襄陽郡峴首山南至宜城百餘里其間雕  
墻峻宇閣閣填列漢宣帝末其中有卿士刺史二  
千石數十家朱軒駢輝華連延掩映于太山廟下  
荆州刺史行部見之欽歎甚盛勅號太山廟道為  
冠蓋里。諸葛亮宅按蜀志云先帝三顧臣于小  
廬之中即此宅也今有井深四丈廣尺五寸迄今  
壘砌如初。桓溫冢：聞鼓角聲即襄陽必有軍



旅。古魚井按南雍州記云古魚井內一魚無肉  
唯骨相連尔。張漢陽碑在縣西二里即東之也  
。孟浩然碑在縣東南一十二里。杜預碑在縣  
東南九里峴山上

鄧城縣

北十三里  
西八里

漢鄧縣地即古樊城齊書云

建武中大將軍曹虎鎮此後魏孝文率兵十萬圍

樊城經月不下即此城也荆州圖副郭仲產摯虞

等記俱云樊本仲山甫之國隋改河南郡為鄧城

郡廢棘陽襄鄉二縣立安養縣唐天寶中改為臨

漢縣以臨漢江為名貞元二十一年以襄州為襄

陽府徙臨漢縣於東古鄧地乃改為鄧城縣。宛

水自鄧州新野縣界流入。鄧城即古鄧城即古

鄧子之國鄧之南鄙。夫人城即晉朱序為刺史

母韓夫人深識兵勢知郡西北角必偏受敵率女

婢斜築二十許丈以捍賊攻後符丕果以兵攻此

處不捷而退因號夫人城。查牙山在縣東四十

里。泌河在縣東北一百一十里流經縣界與白

河合。呼鷹臺在縣東南一里刘表所築表往登

之鼓琴作樂有野鷹來至因名。泌白水在縣東

北九十七里是泌白相合河口



穀城縣

西北四十五里 舊十八鄉 今七鄉

本春秋穀國漢為筑陽縣

自漢魏迄宋並為筑陽縣地宋於此置扶風郡隋

開皇七年改為穀城縣。漢陰縣城在縣北漢為縣

今廢城存。鄧城在縣東北漢書地理志南陽即

漢相蕭何所封也按說夫鄧作管作且二切南陽

有鄧縣鄧昨何切沛國縣若云何之所封當在沛

又云此邑乃高后封何夫人之邑也。蕭相國祠

鮑至南雍州記云何昔受封於此廟今相傳謂城

隍神。薤山在縣西六十里諸山雲起此山無雲

終不降雨諸山無雲此山有雲起必降大雨土人

以為恒驗驗因山薤為名山上有孤竹三莖三年生

一筍幹就竹死代謝如春秋又有白鹿二紫羆一

人不敢犯之。穀神山在縣西十里上有石城號

曰穀城山。筑水在縣南一百步陸澄地理志云

筑水會沔水之處謂之筑口。粉水在縣北六十

里出房州房陵縣東流入縣南雍州記云蕭何夫

人漬粉鮮潔異於諸水因立名。穀城在縣北五

里南雍州記云穀伯綏之舊國也昔城門前有石

人刻其腹曰摩韃慎莫言亦金人緘口銘之流也

今無矣



中廬縣 西南五十八里 本漢中廬縣地春秋廬戎之

國南齊於此立義清縣屬義安郡唐貞觀二年自

今縣東北三十里移於今所在州西五十三里復

為中廬縣。山都縣城秦之邑名廢城在今縣東

北

宜城縣 南九十五里 本楚之鄢都在漢為鄢縣地宋大

明元年以胡之流寓者立華山郡於大堤村即今

縣也後魏改華山郡為宜城郡分新野郡之池陽

縣地因立率道縣屬威寧郡後周保定四年省宜

城郡入率道縣今縣南古宜城即舊郡地唐武德

四年以此邑屬都州貞觀八年廢都州改屬襄州

天寶元年改為宜城縣從古郡名。蠻水西自義

清縣界流入東南經縣西去縣三十里有白公湍

南雍州記云秦將白起伐楚之日涉此水而濟因

號白公湍今有三磧亦名三洲赤石湍。大堤城

今縣城也其俗相傳呼為大堤城迄今不改。黎

丘城漢縣廢城在今縣北。宜城故城漢縣在今

縣南其地出美酒。鹿門廟習鑿齒襄陽記云習

郁為侍中時從光武幸黎丘與光武通夢見蘇嶺

山神光武嘉之拜大鴻臚錄其前後功封襄陽侯



使立蘓嶺之祠刻二石鹿夾祠神通百姓謂鹿門  
廟。木香村段成式別業於此村。生異竹成式  
圖送徐商。為厚謝。廢樂鄉縣在州南二百二  
十里舊管四鄉本春秋郟國之地迄今有郟鄉在  
若水之傍晉隆安五年於今城成置樂鄉縣屬武  
寧郡後魏廢帝元年置郟州貞觀六年廢郟州以  
其地却屬襄州周顯德二年并入宜城縣 皇朝  
開寶五年割隸荆門軍。都亭山在縣西南山上  
有城壘極峻拔為隘險之所一名中山城。郟水  
亦名女泉系本云郟元姓之國黃帝之子昌意降

居若水為諸侯此其後也

南漳縣西南一百四十里漢之臨沮縣地屬南郡郭

仲產南雍州記云晉平吳割臨沮之北鄉立上

黃縣後魏又置重陽縣周改為思安縣隋文帝三  
年改為南漳縣唐武德二年分襄陽郡南漳縣於  
今所置重州貞觀九年州廢來屬襄州。荆州禹  
貢荆及衡陽惟荆州韓子卞和得玉於楚荆山三  
面險絕惟東南一隅終通人徑頂上有池水周迴  
四十餘步喬松翠栢列繞其旁并有石室相傳云  
是卞和宅。祖山習鑿齒襄陽記吳時朱然諸葛



瑾萬或從沮中尋山險道險出祖中祖音如輸祖  
之祖其地在上黃西界去襄陽城百五十里按此  
是地名非山稱也蓋以其地去山密通因為山名  
舊傳云司馬宣王鑿八疊山開路於此停祖以屈  
由八疊為名。清溪山其山高峻庾仲雍荊州記  
云臨沮縣清溪山：東有泉晉郭璞為臨沮長常  
遊此賦遊仙詩云青溪千餘仞中有一道士即此  
也。臨漳山在縣西一百八十里本雞頭山北臨  
漳水。八疊山在縣西四十五里解在祖山

### 光化軍

光化軍理乾本襄州之陰城縣地後廢為鎮故城在  
今穀城縣北 皇朝乾德二年四月改鎮為光化  
軍仍穀城縣割遵教翔鳶漢均等三鄉置乾德縣以

年號為名

領縣一

乾德

軍境

東西八十五里

南北四十一里

四至八到

新置軍未有至東西京并長安里數



東至鄧州穰縣松陽堰為界三十一里

西至均州武當山為界五十五里

南至襄州穀城縣公田村界一十五里

北至鄧州穰縣曹溪澗為界三十一里

東南至襄州鄧城縣古樓村為界三十里

西南至房州永清縣石桶村為界三百里

東北至鄧州穰縣大克村為界二十九里

西北至均州武當縣博口泉澗為界七十一里

戶

皇朝戶主三千六百八十五客三千三百四十五

風俗

與襄州同

土產

元無所貢及土產物

乾元縣

元三鄉

本漢穀城縣遵教翔鸞漢均三鄉乾德

三年置以年號名縣。漢江經縣。馬窟山在縣

東南六里下有窟按南雍州記漢時有馬百匹從

此窟出舊名馬頭山勅改為馬窟。溫水在縣南

七里西南流入漢江南雍記云溫水出弘農縣境

冬月微溫。固王古城在縣東北五里按穀城縣



圖經云晉咸寧中封扶風王子暢為順陽王城內  
有順陽碑。五陌洲在縣西南四里南雍州記鄧  
城南四里有五陌林榆樹連理異本合幹高四丈  
鄉人以為社其洲并樹在五陌林因此為名其樹  
今已枯。漢鄧縣在縣北三里西臨漢江



